

- राज्य मांय लोकसभा चुनाव रा दूजा दौर रा तैत प्रचार रो काम काल पूरो व्हेला- सार्वजनिक सभा अर जुलूस माथे रोक रेहवेला।
- चुनाव प्रचार रो एक दिन बच्च्यो- स्टार प्रचारक अर उम्मीदवार जोरां ऊं प्रचार कर रह्या है-प्रधानमंत्री नरेन्द्र मोदी उनियारा मांय अर पैली वाळा मुख्यमंत्री अशोक गहलोत भीनमाल हलका मांय जनसभावां ने सम्बोधित कीनी।
- हनुमान जयंती रे मौके आज प्रदेश मांय न्यारा-न्यारा धार्मिक कार्यक्रम- सालासर बालाजी रा मेळा मांय देशभर ऊं जातरू पूग्या।

जयपुर, अलवर अर भरतपुर जिलां मांय आज कठे-कठे बिरखा रा आसार-आवता दो तीन दिन मांय पारो चढ़बा री संभावना।

000

राज्य मांय लोकसभा चुनाव रा दूजा दौर रा तैत 13 लोकसभा सीटां माथे 26 अप्रैल ने पड़बा वाळा वोटों सारु चुनाव प्रचार रो काम काल पूरो व्हे जावेला। राज्य रा मुख्य निर्वाचन अधिकारी प्रवीण गुप्ता बतायो के दूजा दौर मांय टोंक-सवाईमाधोपुर, अजमेर, पाली, जोधपुर, बाड़मेर, जालौर, उदयपुर, बांसवाड़ा, चित्तौड़गढ़, राजसमंद, भीलवाड़ा, कोटा अर झालावाड़-बारां लोकसभा हलकां मांय संवारे 7 ऊं सिंज्यां 6 बज्यां ताई वोट पड़ेला। गुप्ता बतायो के आं लोकसभा हलकां मांय काल सिंज्यां 6 बज्यां प्रचार बंद व्हे जावेला। ई पाछे कोई सार्वजनिक सभा या जुलूस नी राख्या जा सकेला। सिनेमा, टेलीविजन या दूजा साधनां ऊं ई जनता सामी चुनाव ऊं जुड़ी कोई अपील नी करी जा सकेला। ई दौरान दूजा राज्यां ऊं लाग्योड़ी सरहदां ई सील कर दी जावेला। अखबारां मांय राजनैतिक विज्ञापन ई मंजूरी लियां पाछे ई छाप्या जा सकेला। ई सागे ई ओपिनियन पोल या दूजा पोल या सर्वे ई नी बताया जा सकेला। एग्जिट पोल माथे रोक लोकसभा चुनाव रा 7वां अर आखिरी दौर मांय 1 जून ने पड़बा वाळा वोटों रा दिन सिंज्यां साढे छः बज्यां ताई जारी रेहवेला।

000

राज्य मांय लोकसभा चुनाव रा दूजा दौर रा तैत 13 लोकसभा हलकां मांय पड़बा वाळा वोटों सारु प्रचार बाबत काल रो दिन बच्च्यो है। काल सिंज्यां पूरा व्हे रह्या प्रचार रा काम ने ध्यान राखता थकां सियासी पार्टियां रा स्टार प्रचारक अर नेता लगातार न्यारी-न्यारी ठौड़ां दौरा कर रह्या है। भारतीय जनता पार्टी रा आला नेता अर प्रधानमंत्री नरेन्द्र मोदी आज टोंक-सवाईमाधोपुर लोकसभा हलका रा उनियारा मांय जनसभा ने संबोधित कीनी। ई मौके प्रधानमंत्री कह्यो के स्थिर अर ईमानदार सरकार देश रा विकास सारु जरूरी है। वे कह्यो के भारत दुनिया मांय तेजी ऊं बधती माली व्यवस्था है अर लारला दस साल मांय 25 करोड़ लोग गरीबी ऊं उबर्या है। प्रधानमंत्री कांग्रेस माथे तुष्टिकरण अर वोट बैंक री सियासत करण रो आरोप मांड्यो। मुख्यमंत्री भजनलाल शर्मा आज दोपहरां मांय पाली रा बाली मांय जनसभा ने संबोधित कीनी। वां रो सिरौही अर डूंगरपुर मांय ई सभा करण रो कार्यक्रम है। फिल्म अभिनेत्री अर भाजपा नेता कंगना रानौत पाली मांय रोड शो कीनो। वां रो जोधपुर मांय रोड शो करण रो कार्यक्रम है।

दूजी कानी अखिल भारतीय कांग्रेस कमेटी रा महासचिव जयराम रमेश आज उदयपुर मांय प्रेस वार्ता कीनी। वे कह्यो के प्रदेश मांय चुनाव रा पैला दौर मांय कम वोट पड़्या है, पण वां ने नतीजा वां री पार्टी रा पक्ष मांय आवण री आस है। राज्य रा पैली वाळा मुख्यमंत्री अशोक गहलोत जालौर लोकसभा हलका रा सायला अर बागोडा मांय जनसभा ने संबोधित कीनी। वां रो आज भीनमाल मांय रोड शो करण रो ई कार्यक्रम है।

जनसभावां मांय विधानसभा मांय विपख रा नेता टीकाराम जूली ई मौजूद रह्या। वे पैली वाळा मुख्यमंत्री अशोक गहलोत सागे रोड शो मांय ई शिरकत करेला। प्रदेश कांग्रेस अध्यक्ष गोविंद सिंह डोटासरा अर पार्टी रा राजस्थान प्रभारी सुखजिंदर सिंह रंधावा खण्डार रा बेहरांवडाकलां मांय चुनावी सभा ने सम्बोधित कीनी। वे भाजपा माथे जनता ने गुमराह करण रो आरोप मांड्यो।

000

राज्य मांय लोकसभा चुनाव री ड्यूटी मांय लाग्योडा कर्मचारियां कानी ऊं हाल ताई 2 लाख 13 हजार 144 वोट डाली ज्या है। मुख्य निर्वाचन अधिकारी प्रवीण गुप्ता आ जाणकारी दीनी। वे बतायो के डाक मतपत्र अर ईडीसी रा सुबीता वाळा कर्मचारियां रा 89 दशमलव 08 फीसदी वोट देवण रो हक इस्तेमाल कर लीनो है। गुप्ता बतायो के राज्य मांय मतदान रा दूजा दौर रा चुणाव वाळी 13 सीटां माथे चुणाव ड्यूटी मांय लाग्योडा अहलकार अर कर्मचारी 25 अप्रैल ताई वोट दे सके है। वे बतायो के प्रदेश मांय हाल ताई 85 हजार 777 पुलिस वाळा, आर.ए.सी. रा 12 हजार 887 जवान, जीआरपी रा 955, 1,078 गैर सरकारी गाड़ियां चलावण वाळा अर 1 लाख बारह हजार 447 दूजा मतदान कर्मचारी वोट दे दीना है।

000

प्रदेश मांय लोकसभा चुनाव रा दूजा दौर वाळा हलकां रा जिला निर्वाचन अधिकारी पात्र मतदातावां ऊं वोट देवण री अपील कर रह्या है। चित्तौडगढ़ रा जिला निर्वाचन अधिकारी आलोक रंजन वां रा संदेश मांय मतदातावां ने 26 अप्रैल ने वोट जरूर देवण री अरज कीनी।

बाडमेर रा एस.पी. नरेन्द्र मीणा ई मतदातावां ऊं बिना ड्रयां वोट देवण री अपील कीनी। वे कह्यो के मतदान केन्द्रां माथे हिफाजत रा माकूल इंतजामात करी ज्या है।

000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला।

आओ मिलकर हम सब मतदान करें, व्यक्ति नहीं उसके व्यवहार को देखकर वोट करें, हमें इस बार नया कुछ करना है जो युवाओं को रोजगार दे सके ,बुजुर्गों को सहयोग दे सके।

000

हनुमान जयंती रे मौके आज प्रदेशभर रा हनुमान मन्दिरां मांय न्यारा-न्यारा धार्मिक कार्यक्रम राख्यी ज्या। चूरु रा सालासर बालाजी धाम मांय मेळो भर रह्यो है।

राजधानी जयपुर रा हनुमान मिदरां मांय ई सोहवणी सजावट करीजी है। मोती डूंगरी गणेश मिन्दर ऊं हनुमान जी री शोभा यात्रा निकाळी ज्यी। अम्बाबाडी रा हनुमान मिन्दर मांय आज संवारे पंचामृत अभिषेक करी ज्यो अर अखण्ड पाठ अर सुंदरकाण्ड रा कार्यक्रम राख्यी ज्या। मिन्दरां मांय भांत-भांत री झाकियां सजाई ज्यी है।

पापड वाळा हनुमान जी अर खोले के हनुमानजी मिन्दर मांय ई खास आयोजन कर्या जा रह्या है। बूंदी मांय मालनबासी बालाजी मिन्दर समेत दूजा मिन्दरां मांय मोटी तादाद मांय जातरू दर्शन कीना। अलवर मांय कैडलगंज ऊं ध्वज यात्रा निकाळी ज्यी, जिण मांय मोटी तादाद मांय जातरू शिरकत कीनी। जैसलमेर मांय निकाळी ज्यी शोभायात्रा मांय सज्या-धज्या ऊंटां माथे सगळां री निजर रही। सांचौर जिला रा गोलासन रा हनुमान मिन्दर मांय आज भजन संध्या राख्यी ज्यी है। सीकर रा देवीपुरा बालाजी धाम मांय दो दिन रा भजन-कीर्तन रा कार्यक्रम राख्या जा रह्या है। सीकर री

स्कूलां मांय विद्यार्थी हनुमान जी री पूजा कीनी। सलूमबर रा हनुमान मिन्दरां मांय ई संवारे ऊं ई मोटी तादाद मांय जातरू पूग्या। सराडा मांय खास पूजन अर संत समागम राख्यी ज्यी।

000

मुख्य सचिव सुधांश पंत कह्यो है के पचपदरा मांय बण रही रिफाइनरी रो काम बेगा ई पूरो व्हेला। रिफाइनरी रा दौरा पाछे जयपुर मांय खबरनवीसा सागे बातचीत करता थकां वे कह्यो के काल पचपदरा मांय रिफाइनरी रा काम रो जायजो लेवण सागे ई अहलकारां ऊं इण रा काम री जाणकारी लीनी।

000

नीमकाथाना जिला मांय पाटन रा रामपुरा घाटी मांय पाटन थाना पुलिस री गाडी माथे आज ओवरलोड ट्रेलर पलट जावण ऊं तीन पुलिस वाळां री मौत व्हे ग्यी। हादसा मांय पुलिस री गाडी ने घणो नुकसाण व्ह्यो। पुलिस मामला री जांच कर रही है। भरतपुर मांय बेरी गांव कने ट्रेलर री टक्कर ऊं ट्रेक्टर माथे सवार एक महिला री मौत व्हे ग्यी अर दो जणा जख्मी व्हे ग्या। बूंदी मांय गामछ पुलिया कने एक मोटरसाईकिल सवार री ट्रेलर री फेंट मांय आ जावण ऊं मौत व्हे ग्यी।

000

प्रदेश मांय लारला चौबीस घंटा मांय केई ठोडां पारो 1 ऊं 2 डिग्री सेल्सियस ताई चढ्यो। मौसम विभाग रे मुजब हालांकि घणखर हलकां मांय पारो सामान्य ऊं नीचे रह्यो। सब ऊं बत्तो 39 दशमलव 4 डिग्री सेल्सियस तापमान बाडमेर मांय दर्ज करी ज्यो। आवता दो-तीन दिन मांय घणखर ठोडां अधिकतम तापमान मांय 2 ऊं 3 डिग्री सेल्सियस री बधोतरी रा आसार है। जोधपुर अर कोटा संभाग मांय 25 अर 26 अप्रैल ने अधिकतम तापमान 41 ऊं 42 डिग्री सेल्सियस बीचे रेहवण री संभावना है। ई बीचे आज जयपुर, अलवर अर भरतपुर जिलां मांय बादळां री गाज सागे जोरदार बायरो बाजण अर हल्की बिरखा रा आसार है।

000